

■ PLED PER LA DUMENGIA

Dus e dus fan quatter

DA GISULA TSCHARNER

En quests dis, almain la dumengia mintgamai, envi-dais vus las chandailas dal cranz d'advent. Tut tenor isanza l'emprim mo ina chandaila, suenter duas, trais e curt avant Nadal tut las quatter glischs. Pli lungas che las notgs d'advent, pli bleras chandailas han dad arder e sclerir. Quai è en sasez evident, na declerond dentant betg il decurs dal advent cun las quatter staziuns la regularitad da quellas.

Pertge dovri exact 4 dumengias per sa preparar a Nadal? Cun la naschienscha da Jesus n'han ellas da far nagut zunt; la Maria en gravidanza ed il Josef en sia situaziun malempernaivla, quels dus avevan auters problems ordavant che dumbrar dumengias. La cifra quatter regorda als 4 elements ch'èn preschents da guisa misteriusa en in eveniment da tala grondezza. Gia en maletgs e texts dal medieval e pli tard chatt'ins questa simbolica. L'emprim advent è deditgà a la terra, il segund a l'aua, il terz al feu ed il quart a l'aria. En il text dals evangelis chatt'ins bleras correspundenzas, per exempel: Il sontg spiert (aria), annunzià tras l'anghel ed emplenind la Maria, «schendra» quasi ses uffant. L'element terra sa manifesta en la pertga da la sontga Barbara en la chanzun «Es ist ein Ros' entsprungen aus einer Wurzel zart» ubain la conjunziun dals planets Saturn e Jupiter: Spir feu sur la stalla da Betlehem!

Il cranz verd cun las quatter coordinatas sin il rudè sa tschenta en mia vita d'enviern sco in Mandala, in punct da cristallisaziun nua cumenza mia entrada interna vers il center da la «Notg da las notgs». Ils 4 elements ma mainan en ina cumplexivitat reala ed animescha er mes senns. In tip per ornar ina gia autramain Tes tschupè d'advent: Cun crappets, tschivlotters u rodas da vent, sper la segunda chandaila in bellet vashet cun aua – uschia sas Ti T'orientar bain e Ta sviluppar envers il center, Nadal. Ti fas in pitschen peleginadi.